



**TAJUK KHUTBAH JUMAAT**

**Siri: 31/2023**

**MENJAGA AQIDAH ISLAM**

**4 Ogos 2023**

*Bersamaan*

**17 Muharram 1445**

**DIKELUARKAN OLEH:**

**JABATAN HAL EHWAL AGAMA  
TERENGGANU**

**PERINGATAN:**

Adalah diingatkan bahawa sebarang penambahan dan pemindaan terhadap isi kandungan teks khutbah yang telah disediakan oleh Jabatan Hal Ehwal Agama Terengganu adalah **DILARANG**.

Khatib yang bertugas hendaklah menyemak kembali **RUKUN, AYAT AL-QURAN** dan helaian muka surat yang diterima. Pastikan teks dibaca terlebih dahulu sebelum menyampaikan khutbah.

## KHUTBAH PERTAMA

أَحْمَدُ لِلَّهِ الْقَائِلِ: اللَّهُ وَرَبُّ الدِّينِ آمَنُوا يُخْرِجُهُم مِّنَ الظُّلُمَاتِ إِلَى النُّورِ

وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ،

وَأَشْهَدُ أَنَّ سَيِّدَنَا مُحَمَّدًا عَبْدَهُ وَرَسُولَهُ،

اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ.

أَمَّا بَعْدُ، فَيَا عِبَادَ اللَّهِ، اتَّقُوا اللَّهَ، إِنَّ أَوْلِيَاءَهُ إِلَّا الْمُتَّقُونَ.

**Wahai saudaraku muslimin yang dirahmati Allah Ta'ala**

Sama-samalah kita berusaha meningkatkan sifat ketaqwaan kita kepada Allah Ta'ala dengan penuh keikhlasan kepadaNya, mengikut petunjuk Nabi Muhammad SAW. Semoga segala amalan kita diperkenanNya dan dijadikan penyelamat kita di dunia yang fana ini dan di akhirat kelak.

Khutbah pada hari yang berbahagia ini bertajuk:

### **MENJAGA AQIDAH ISLAM**

**Sidang Jumaat yang dirahmati Allah,**

Islam merupakan satu-satunya agama yang dapat menyelamatkan umat manusia di dunia dan di akhirat.

Islam adalah agama yang paling sempurna, tidak ada ajaran dan pegangan yang paling baik dan indah selain yang dibawa oleh Islam.

Hanya Islam agama yang diredai dan diperakui oleh Allah SWT. Firman Allah swt dalam surah Ali Imran ayat 19:

إِنَّ الدِّينَ عِنْدَ اللَّهِ الْإِسْلَامُ

**Maksudnya** : "Sesungguhnya agama yang benar dan diredhai di sisi Allah hanyalah agama Islam"

Lantaran itu, sebagai seorang muslim lelaki atau muslimah perempuan-masing-masing berkewajipan menjaga dan memelihara aqidahnya daripada sebarang perkara yang boleh menyebabkan aqidahnya rosak atau pun terbatal.

Aqidah yang rosak atau pun terbatal, boleh menyebabkan dia telah terkeluar daripada agama Islam yang sebenar atau pun dia menjadi murtad.. Murtad boleh menyebabkan amalan kebaikan seperti ibadah yang telah dilakukannya sebelum itu akan binasa dan sia-sia sekiranya gejala murtad itu berterusan sehingga ke akhir hayatnya.

Firman Allah swt dalam surah al-Baqarah ayat 217 :

وَمَنْ يَرْتَدِدْ دَمِينَكُمْ عَنْ دِينِهِ، فَيَمُتْ وَهُوَ كَافِرٌ فَأُولَئِكَ حَبِطَتْ

أَعْمَالُهُمْ فِي الدُّنْيَا وَالْآخِرَةِ وَأُولَئِكَ أَصْحَابُ النَّارِ هُمْ فِيهَا

خَالِدُونَ ﴿٢١٧﴾

**Maksudnya** : "Dan sesiapa di antara kamu yang murtad (berpaling tadah) daripada agamanya (agama Islam) lalu dia mati sedang dia tetap kafir, maka orang-orang yang sedemikian, rosak binasalah amal usahanya yang baik di dunia dan di akhirat dan mereka itulah ahli neraka, kekal mereka di dalamnya selama-lamanya"

### **Sidang Jumaat yang diberkati Allah,**

Aqidah Islam merupakan perkara yang terpenting dan sensitif dalam agama Islam.

Ia tidak dibenarkan untuk dipersenda atau dipermain-mainkan sekali-kali sama ada menerusi hati sanubari atau melalui perkataan atau pun perbuatan.

Pelakuan mempersenda atau mempermain-mainkan perkara aqidah Islam mengundang dosa yang besar dan membawa kepada terkeluar daripada landasan agama Islam atau murtad, sekiranya dia tidak bertaubat.

### **Muslimin sekalian,**

Antara contoh murtad yang dilakukan melalui hati ialah :

Pertama : Tidak mengakui dengan hati bahawa Allah sahaja yang layak disembah atau merasai syak mengenai kewujudan Allah swt.

Kedua : Meragui kebenaran kitab Al Quran yang diturunkan kepada Nabi Muhammad saw.

Ketiga : Enggan percaya kewujudan hari kiamat atau perkara-perkara berhubungan dengannya seperti syurga, neraka dan lain-lain sebagaimana yang dinyatakan dalam Al Quran.

Ringkasnya, seseorang itu boleh menjadi murtad apabila dia mengingkari perkara-perkara yang disebutkan dalam Rukun Iman dan Akidah Islam.

### **Saudaraku muslimin yang dikasihi Allah swt**

Antara contoh murtad yang disebabkan oleh perbuatan ialah :

Pertama : Sengaja melakukan perbuatan yang membawa kepada kekufuran seperti menyamakan agama lain dengan Islam atau mengamalkan amalan-amalan yang menyamai amalan khusus agama lain.

Kedua : Perbuatan menghina kitab Al Quran atau mempersendakannya dalam sebarang bentuk.

### **Sidang Jumaat sekelian,**

Antara contoh percakapan yang membawa kepada murtad ialah :

Pertama : Sengaja mengeluarkan kata-kata yang menyalahi rukun Iman dan akidah Islam seperti mengatakan bahawa Allah itu dua, tiga, bukannya satu dan sebagainya.

Kedua : Dengan sengaja mengeluarkan kata-kata yang jelas menolak perintah atau larangan Allah swt .

Banyak lagi contoh-contoh yang dinyatakan oleh para ulama Islam dalam kitab-kitab mereka. Kesemuanya perlu dipelajari dan diketahui secara terperinci bagi menyelamatkan diri daripada terlibat dengan gejala yang meruntuhkan aqidah seseorang.

## Muslimin yang dirahmati Allah,

Sebagai umat Islam, kita semestinya berwaspada dan berhati-hati dalam membicarakan mengenai soal-soal agama, apatah lagi isu-isu yang menyentuh akidah Islam.

Bagi individu yang sering menjadikan perkara agama sebagai bahan jenaka atau olok-olok, dan mempermainkan perkara yang disepakati dalam agama Islam, tidak syak lagi tindakan itu boleh membawa kepada murtad.

Justeru, marilah kita terus mendalami dan memahami ajaran Islam dengan menghadiri majlis-majlis ilmu di masjid, surau dan seumpamanya agar kita dapat menjaga dan memelihara keislaman kita dengan sebaik-baiknya.

Sama-samalah kita terus berdoa semoga hati kita tetap di atas landasan agama Allah ini, tidak terpesong sesudah kita diberi petunjuk.

Amin ya Rabbal alamin .

أَعُوذُ بِاللَّهِ مِنَ الشَّيْطَانِ الرَّجِيمِ

وَمَنْ يَبْتَغِ غَيْرَ الْإِسْلَامِ دِينًا فَلَنْ يُقْبَلَ مِنْهُ وَهُوَ فِي الْآخِرَةِ مِنَ

الْخَاسِرِينَ

**Maksudnya :** Dan sesiapa yang mencari agama selain agama Islam, maka tidak akan diterima daripadanya, dan ia pada hari Akhirat kelak dari orang yang rugi.

(Surah Aali 'Imran ayat 85)

بَارَكَ اللهُ لِي وَلَكُمْ فِي الْقُرْآنِ الْعَظِيمِ،  
وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ،  
وَتَقَبَّلَ اللهُ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ،  
أَقُولُ قَوْلِي هَذَا وَأَسْتَغْفِرُ اللهَ الْعَظِيمَ لِي وَلَكُمْ،  
وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ فَاسْتَغْفِرُوهُ،  
إِنَّهُ هُوَ الْغَفُورُ الرَّحِيمُ.

## **KHUTBAH KEDUA**

الْحَمْدُ لِلَّهِ رَبِّ الْعَالَمِينَ. وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ،  
وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا  
مُحَمَّدٍ، وَعَلَى آلِهِ وَأَصْحَابِهِ أَجْمَعِينَ.  
أَمَّا بَعْدُ، فَيَا عِبَادَ اللَّهِ! اتَّقُوا اللَّهَ فَقَدْ فَازَ الْمُتَّقُونَ.

**Sidang Jumaat yang dikasihi.**

Marilah juga kita memperbanyakkan ucapan selawat dan salam kepada Rasulullah SAW sebagaimana firman Allah dalam surah al-Ahzab ayat 56:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا ﴿٥٦﴾

اللَّهُمَّ صَلِّ عَلَى سَيِّدِنَا مُحَمَّدٍ، وَعَلَى آلِ سَيِّدِنَا مُحَمَّدٍ، كَمَا صَلَّيْتَ عَلَى سَيِّدِنَا  
إِبْرَاهِيمَ، وَعَلَى آلِ سَيِّدِنَا إِبْرَاهِيمَ، وَبَارَكْ عَلَى سَيِّدِنَا مُحَمَّدٍ، وَعَلَى آلِ سَيِّدِنَا  
مُحَمَّدٍ، كَمَا بَارَكْتَ عَلَى سَيِّدِنَا إِبْرَاهِيمَ، وَعَلَى آلِ سَيِّدِنَا إِبْرَاهِيمَ فِي الْعَالَمِينَ،  
إِنَّكَ حَمِيدٌ مُجِيدٌ.

اللَّهُمَّ اغْفِرْ لِلْمُؤْمِنِينَ وَالْمُؤْمِنَاتِ، وَالْمُسْلِمِينَ وَالْمُسْلِمَاتِ، الْأَحْيَاءِ مِنْهُمْ  
وَالْأَمْوَاتِ، إِنَّكَ سَمِيعٌ قَرِيبٌ مُجِيبُ الدَّعَوَاتِ.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْفَحْشَاءَ مَا لَا يَصْرِفُهُ غَيْرُكَ.

اللَّهُمَّ إِنَّا نَعُوذُ بِكَ مِنَ الْبَرَصِ وَالْجُنُونِ وَالْجَذَامِ وَمِنَ سَيِّئِ الْأَسْقَامِ. اللَّهُمَّ  
اشْفِ مَرَضَانَا وَارْحَمْ مَوْتَانَا، وَالطِّفْ بِنَا فِيمَا نَزَلَ بِنَا.

اللَّهُمَّ احْفَظْ مَوْلَانَا الْوَائِقَ بِاللَّهِ السُّلْطَانَ مِيزَانَ زَيْنِ الْعَابِدِينَ، ابْنَ الْمَرْحُومِ  
السُّلْطَانِ مُحَمَّدِ الْمُكْتَفِيِّ بِاللَّهِ شَاهٍ، وَأَنْزِلِ الرَّحْمَةَ عَلَيْهِ وَعَلَى السُّلْطَانَةِ نُورِ  
زَاهِرَةَ، سُلْطَانَةِ تَرَغْكَانُو.

وَاحْفَظْ أَوْلَادَهُ وَأَهْلَهُ وَرِعَايَاهُ مِنَ الْمُسْلِمِينَ وَالْمُسْلِمَاتِ فِي الدُّنْيَا وَالْآخِرَةِ،  
بِرَحْمَتِكَ يَا أَرْحَمَ الرَّاحِمِينَ.

اللَّهُمَّ احْفَظْ وِلْيَ الْعَهْدِ تَعَكُّو مُحَمَّدَ إِسْمَاعِيلَ ابْنَ الْوَائِقِ بِاللَّهِ السُّلْطَانَ مِيزَانَ  
زَيْنِ الْعَابِدِينَ.

**Ya Allah, Ya Rahman, Ya Rahim**

Perbaikilah hubungan di antara kami dengan penuh kasih sayang.  
Anugerahkanlah kami dengan kesihatan dan kesejahteraan. Kurniakanlah  
kepada kami nikmat keamanan dan keselamatan yang berterusan.

## **Ya Allah**

Limpahkanlah dalam kehidupan keluarga kami ketenangan dan kebahagiaan. Semaikanlah semangat muafakat dalam kejiranan dan qaryah kami. Suburkanlah para belia dan remaja kami jiwa yang mantap, iman yang teguh, ilmu yang bermanfaat dan akhlak yang mulia. Jauhkanlah mereka dari perkara-perkara yang boleh menjatuhkan maruah diri, keluarga dan negara.

## **Ya Allah,**

Kami pohon ke hadratMu, mantapkanlah pegangan kami menurut ajaran Ahli Sunnah Waljamaah dan peliharalah kami daripada amalan dan akidah yang menyeleweng dan sesat. Bukakanlah hati kami untuk mendirikan solat fardhu lima waktu, menunaikan zakat dan kefarduan yang lain. Berkatilah hidup orang-orang yang menunaikan zakat dan menyayangi fakir miskin serta mereka yang menginfakkan harta untuk pembangunan umat Islam Terengganu.

## **Ya Allah,**

Jadikanlah negeri Terengganu, negeri yang aman dan damai. Bukakanlah pintu-pintu rezeki dari segala penjuru. Jauhkanlah negeri kami ini dan negara umat Islam seluruhnya dari segala malapetaka, musibah dan apa jua kemurkaanMu. Amin Ya Rabbal alamin.

رَبَّنَا آتِنَا فِي الدُّنْيَا حَسَنَةً وَفِي الآخِرَةِ حَسَنَةً وَقِنَا عَذَابَ النَّارِ.  
وَصَلَّى اللهُ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَسَلَّمَ.  
وَالْحَمْدُ لِلَّهِ رَبِّ الْعَالَمِينَ.

عِبَادَ اللهِ!

أذْكُرُوا اللهَ الْعَظِيمَ يَذْكُرْكُمْ، وَاشْكُرُوهُ عَلَى نِعَمِهِ يَزِدْكُمْ،  
وَلَذِكْرُ اللهِ أَكْبَرُ، وَاللهُ يَعْلَمُ مَا تَصْنَعُونَ.  
□ قُومُوا إِلَى صَلَاتِكُمْ، يَرْحَمَكُمُ اللهُ.

